



10

Niining Leksyona Matun-an Mo Kini

Ang Samingay Mahitungod Sa Toril Sa Mga
Karnero

Si Jesus ang Maayong Magbalantay

Si Jesus Gisalikway Sa Mga Judio

ANG SAMBINGAY MAHITUNGOD SA TORIL SA MGA KARNERO

(Basaha ang Juan 10:1-6)

Ang sambingay mao ang usa ka hamubong hinubay nga nagagamit sa mga butang sa kinaiyahan aron pagpasabot sa mga espirituhanong kamatuoran. Si Jesus mao ang maayong Magbalantay nga nagaatiman sa Iyang mga karnero ug nagapakaon kanila. Ang Iyang mga karnero mao kadtong mga nagatoo ug nagasunod Kaniya. Sa unang mga panahon ang magbalantay sa karnero naga-una paglakaw sa iyang mga karnero. Ug iyang tawgon sila samtang magapadayon sila paglakaw. Ang tanang karnero nakaila sa iyang tingog ug nagasunod sila kaniya. Kon adunay laing tawo nga magatawag sa mga karnero, ang mga karnero dili moduol sa maong tawo, tungod kay nailhan nila ang tingog sa ilang Magbalantay.

Buhata Kini

1. Nganong gitawag man ni Jesus ang Iyang kaugalingon nga Maayong Magbalantay?
 - . . . a) Tungod kay aduna Siyay daghang mga karnero.
 - . . . b) Tungod kay gibantayan Niya ug maayo ang mga karnero ug mga kanding
 - . . . c) Tungod kay nagaatiman Siya kanila nga mga Iya sama sa usa ka maayong magbalantay nga nagaatiman sa iyang mga karnero.

SI JESUS ANG MAAYONG MAGBALANTAY (Basaha ang Juan 10:7-21)



Naghisgut si Jesus sa Iyang kaugalingon ingon nga pultahan. Sa nasud sa Israel kaniadto ang magbalantay magatipig sa iyang mga karnero sulod

sa usa ka koral aron mapanalipdan kini gikan sa mga mananap nga ihalas. Gitawag kini ug toril. Human mapahiluna ang mga karnero sa sulod sa toril, ang magbalantay magalingkod sa pultahan. Panalipdan niya ang mga karnero. Wala gayuy mga mananap nga ihalas nga makasulod samtang anaa siya nagbantay.

Ang usa ka kawatan dili moagi sa pultahan kon buot siyang mangawat. Mosaka siya sa koral kon mahimo niya. Miingon si Jesus nga ingon niini ang ubang mga pangulo sa relihiyon. Wala gayud sila mahigugma sa mga katawhan kondili nagtinguha lang sila sa ilang makuha gikan sa mga tawo.

Miingon si Jesus nga wala Siya moanhi aron sa paggun-ob kondili mianhi Siya aron paghatag ug kinabuhi - kinabuhi nga madagayaon gayud. Kining kinabuhing madagayaon maoy usa ka kahibulongang pag-kinabuhi dinhi sa kalibutan. Ug kini walay katapusan - molungtad hangtud sa langit.

Miingon si Jesus, "Ako mao ang pultahan. Kon adunay mosulod agi kanako, siya maluwas." Wala moingon si Jesus nga usa Siya sa daghang mga pultahan kondili nga Siya ra gayud mao

ang Pultahan ug wala nay lain. Nagatinguha ang mga katawhan nga makaduol sa Dios pinaagi sa mga santos, kang Maria, sa mga propeta, sa mga simbahan, ug sa paghimo ug maayong mga buhat ngadto sa uban. Apan si Jesus mao ra gayud ang daian.,

Miingon si Jesus nga ang tawo kinahanglan moduol Kaniya. Ingon nga ang pultahan abli alang sa mga karnero, si Jesus usab nagadapit sa matag-usa sa pagduol Kaniya ug sa pagdawat sa kinabuhing dayon. Apan dili mamugos ang Dios ni bisan kinsa sa pagduol kang Jesus aron mahimong usa sa Iyang mga magtotoo. Ang matag tawo kinahanglan magapili alang sa iyang kaugalingon. Ang tawo nga mosulod sa toril ni Jesus mamaluwas. Kon dili siya buot mosulod, dili usab siya maluwas. Ingon niini ka yano ang kaluwasan.

Miingon si Jesus nga ihatag Niya ang Iyang kinabuhi alang sa Iyang mga karnero. Buhaton Niya kini pinaagi sa Iyang kaugalingong pagbuot tungod kay wala may bisan kinsa nga makakuha sa Iyang kinabuhi gikan Kaniya. Niadtong higayona daghang mga tawo ang nagtinguha sa pagpatay kang Jesus. Apan dihay adlaw nga gitagana diin siya ilansang sa krus nga hinimog kahoy ug Siya mamatay.



Kon panahon na nga si Jesus mamatay, tugutan na Niya ang Iyang mga kaaway sa pagpatay Kaniya. Apan nasayran ni Jesus nga ang kamatayon dili maoy katapusan alang Kaniya. Miingon Siya nga, "Ako nagahalad man sa akong kinabuhi aron sa paghalad niini mabawi

ko ra unya.” Mabanhaw si Jesus aron sa pagpamatuod sa Iyang gahum ibabaw sa kamatayon. Ang Iyang pagkabanhaw maoy pagpamatuod nga Siya mao gayud ang tinuod nga Anak sa Dios.

Sa makausa pa ang mga katawhan nasuko sa Iyang gipanulti apan adunay pipila nga mitoo Kaniya. Kadtong wala motoo dili Iyang mga karnero tungod kay ang Iyang mga karnero nakaila man sa iyang tingog.

Buhata Kini

2. Pila man ang pultahan sa kaluwasan?
 - . . . a) Adunay daghan tungod kay daghan man ang relihiyon diin pinaagi niini mamaluwas kita.
 - . . . b) Adunay labing minus upat, si Maria, ang mga santos, mga propeta ug ang simbahan.
 - . . . c) Adunay usa lamang ka pultahan ug kini nga pultahan mao si Jesus.
3. Unsa may angay mong pagabuhaton?
 - . . . a) Kinahanglan nga mosulod ka sa pultahan aron mamaluwas ka.
 - . . . b) Magpaabot ka nga adunay usa nga moabli sa pultahan.
 - . . . c) Walay imong pagabuhaton.
4. Giunsa man ni Jesus pagsulti ang Iyang gugma ngadto sa Iyang mga karnero?
 - . . . a) Nagadala Siya kanila ngadto sa malunhaw nga sibsibanan.
 - . . . b) Ihatag Niya ang Iyang kinabuhi alang sa mga karnero.
 - . . . c) Dad-on Niya sila ngadto sa linaw nga tubig.

SI JESUS GISALIKWAY SA MGA JUDIO (Basaha ang Juan 10:22-42)

Dihay mga tawo nga buot mopatay kang Jesus tungod kay miingon man si Jesus nga Siya Anak sa Dios (makita sa bersikulo 36) ug nga naghatag Siya sa kinabuhing dayon ngadto sa mga nagasunod Kaniya (bersikulo 28). Ang uban midawat Kaniya ingon nga ilang maayong magbalantay ug misunod Kaniya. Ikaw usab nagkinahanglang mopili kon mosunod ka ba kang Jesus o magalakaw ba sa imong kaugalingong dalan sama sa usa ka karnerong nahisalaag.

Buhata Kini

5. Sa pagpaila ni Jesus nga Siya mao ang magbalantay, giunsa man Siya pagtagad sa mga tawo?
 - . . . a) Ang uban buot mopatay Kaniya ug ang uban misunod Kaniya.
 - . . . b) Silang tanan misalikway kang Jesus.
 - . . . c) Mitoo silang tanan kang Jesus.

6. Itandi ang imong tubag sa hustong tubag nga anaa sa katapusan niining leksyona.

7. Sulati ang imong rekord sa estudyante alang sa ika-10 nga leksyon.

Mga Hustong Tubag Sa Ika 10 Nga Leksyon

Kon aduna kay 5 ka hustong tubag, markahi ug labing maayo ang imong grado; kon 4, maayo ug kon 3 ra, kasarangan. Kon kubos sa 3 ang imong hustong tubag, basaha pag-usab kining leksyona.

1. c) Tungod kay nagaatiman Siya kanila nga mga Iya sama sa usa ka maayong magbalantay nga nagaatiman sa iyang mga karnero.
2. c) Adunay usa lamang ka pultahan ug kini nga pultahan mao si Jesus.
3. a) Kinahanglan mosulod ka sa pultahan aron mamaluwas ka.
4. b) Ihatag Niya ang Iyang kinabuhi alang sa mga karnero.
5. a) Ang uban buot mopatay Kaniya ug ang uban misunod Kaniya.

Gidaghanon sa Hustong Tubag _____

Grado _____